



جاوید حیات جاوید

نمیڑو ژپ

"اے مه ژانے اوتھانو بیٹی پورے کی" --- ہش بیتو چھامئیران نو--- "کی نو
 پُھک موڑو غونی بوس کی" --- ہش بیتو اولتی تو یان-- وور بی بیو جگر انگار دی پولوئی پھیرو بیٹی
 اوشوئے۔ غیچ ہوریکو سوم نان بیہتی، اچی نان بیلی گیتی توغو پوشوران ژوتی کھوڑ بیہچے
 اسیتائے۔ تت ہورو سورہ ظلم کوری زارو موشوتے پرائے۔ ہورو موش اگرکی عمرہ زیاد اوشوئے مگم
 وور بی بیو خونخان غون کوری ہائے اسیتائے۔ مزدوریار گیاوا موٹہ آف غیرتی حقوتین توریتائے۔
 تتو بریکو وختہ شبیرو اژی ای سال بیٹی اوشوئے۔ شروعہ گومیت گینی پُھک ہمدردی ارینی وا
 وور بی بی ہے معصومو سورہ غیچ دیتی ہال ہوئے۔ ای سال اچہ ہورو بریژانگینی ہورو دیتی دُوراری
 داڑیئتانی۔ شبیر پونج سالہ ہوئے، بلبو غون چوڑی توپھئے کوسیکہ پرائے۔ تان فروخو شیرین نانو
 پازہ دیتی ہوستان توغو گوڑی درے شوکھور غیرتی سخت نماکین بیکہ پرائے۔۔۔ وور بی بی ہر ای
 غموروخیتائے وا تان شیرینو افسہ تھشوش بیٹی ہال ہوئے۔۔

بیہ رمضان اوتی شبیرو اشکامہ چھومیک شروع اریر۔ شیرین نان کیاوت روچی چھینیتائے،
 کیاوت زار اوپوئے، ہوش نو کوری جگرو نسو کارہ دیتی کیاوت دعاگوان وا کیاوت ڈاکترانان نسین
 کوسیکہ پرائے۔۔۔ ہردیاری کا کیاغ کی نو اریر ہورو کیہ اثر ہوئے۔۔۔! وور بی بیو جیپ خالی، زپ لوق،
 کپال دواڑو، بوٹ اولوشیرو وا ہوروتین کا دعا وا دوائی کویان۔۔۔ شیرین نانو ہردی قرار نو کوراؤ
 اوشوئے وا جگرو نسوتین پھیری کوراؤ ہال ہوئے۔

نمیڑو نست انوسین شبیر پُھک غیچ اہی اریر۔ شیرین نان بشار گانیکو نمیڑو تین زپ وا ایوکون
 مشکیتائے۔۔۔ ایوکون ہوئے مگم وور بی بی زپ کورار انگوئے۔۔۔؟ ای بتین کیڑی دُوری اسیتائے۔۔
 شبیرو کارہ دیتی کیڑیو بوکہ لوق دیتی دیہو کمپوڈیرو دُورہ ہائے۔۔۔ "مه قیامتو برارے مه کیڑیو
 گانی پُھک پیسہ متے دیت کی تان پیہ ای پھولوکوئے نمیڑو تے زپ گانیسام۔" کمپوڈیر کیڑیو پھار
 گانی ریتائے کی "تہ دوائیو وام تان ہائی نو چاکونیان وا کیہ پیسہ پیسہ ريسان"۔۔۔ کمپوڈیر وور بی
 بیو تین ای خور تھون بیکو کیڑیو ساری دی ہوستان پرویلی خیق دی ناامید بیٹی راہی اریر۔۔۔
 دُورہ توری شام بیکو شبیرو طبیعت خیق دی خراب ہوئے۔ ای دی ٹک نو بیٹی روشتی پستہ
 پرائے۔۔۔ ویلاغبیلو بیکو سخت الٹی کوری بے خودہ ہوئے۔۔۔ شیرین نان اچی ڈاکترو تے دیتائے۔۔۔
 ہورو دُورہ توریتائے کی ہورو اژیلی ای الاگول کوری اسونی۔۔۔ ویزینو ہسے تھون بیک کیاغ
 اوشوئے۔۔۔ ہنون ہوروتے ہش تھون ہوئے کی ہورو قالبہ لئے چھوچھو ہوئے۔۔۔ ناموتی اچی
 دیتائے۔۔۔ ہے موڑی ڈاکترو ژاؤ بجلی چوکیتائے۔۔۔ ڈاکتر ہورو پازہ دیتی ناموتی ہسپتالو ویشکی
 دیتائے۔

آسمانان مالک وور بی بیو وا ڈاکٹرو دی پوشاؤ اوشوئے --- ایغو بے بسیو وا ایغو مستیو --- وور بی بی
دُورہ توریتائے وا ڈاکٹر ہسپتالہ --- وور بی بی وا ڈاکٹر کھاڑ تان جگران نسان ساری ہوست
پارویلیکو چق بیٹی اسیتانی --- وور بی بی دُورہ توری لوڑیتائے کی توغو جگرو نس ہش تان
پیخہین --- پہاری ڈاکٹرو ژاؤ علاج بیکو غیچہان اہی اریر --- ہرونیہ تان ڈاکٹرو ژانی کیہ لُو ہائے وا
ناموتی تان دُورو ویلٹی دیتائے --- دُورہ توری تان ژاؤو نمیزو زپان پازہ دیتی وور بی بی یو دُورو ویلٹی
دیتائے --- وور بی بی تان جگرو پونگہ سور لاکھی ژوواؤ اوشوئے --- ڈاکٹرو پوشی سورو اہی اریر وا
ڈاکٹر ریتائے کی "مہ قیامتو اسپخار شبیروتے نمیزوتین زپ انگیتی اسوم" --- ہرونیہ تان شبیر پک
تازان غون غیچہان اہی اریر وا ریتائے کی "اے نان مہ ژپ" --- خیقو موخہ امیدو روشتیو پوشی
ڈاکٹر اوچے وور بی بیو غیچہاری اشرو نیسیتانی وا خوشانیو ہمی اشرو ای بیٹی زمینہ چوٹی ای
بیٹی چھوتیہ ژارے ہونی ---